



«Նոր ժամանակի կրթություն»
ՀԿ

ՀԵՐԹԱԿԱՆ ԱՏԵՍՏԱՏԱՎՈՐՄԱՆ ԵՆԹԱԿԱ
ՈՒՍՈՒՑԻՉՆԵՐԻ ՎԵՐԱՊԱՏՐԱՍՏՄԱՆ
ԴԱՍԸՆԹԱՑ

ԱՎԱՐՏԱԿԱՆ ՀԵՏԱԶՈՏԱԿԱՆ ԱՇԽԱՏԱՆՔ

Հետազոտության թեման՝ «Սովորողների մեջ արժեքային համակարգի ձևավորումը առարկայի դասավանդման ընթացքում»

Առարկան՝ Հայոց լեզու և գրականություն

Հետազոտող ուսուցիչ՝ Անտոնյան Լեյլի

Ուսումնական հաստատություն՝ Երևանի Հենրիկ Խաչատրյանի անվան թիվ 199 հիմն. դպրոց

Երևան 2023

ԲՈՎԱՆԴԱԿՈՒԹՅՈՒՆ

ՆԵՐԱԾՈՒԹՅՈՒՆ

ՀՊԶ ՊԱՀԱՆՁՆԵՐԸ ԵՎ ՀԱՅՈՑ ԼԵԶՈՒ, ԳՐԱԿԱՆՈՒԹՅՈՒՆ

ՈՒՍՈՒՄՆԱԿԱՆ ԲՆԱԳԱՎԱՌՆԵՐԻ ՆՊԱՏԱԿՆԵՐԸ՝ ՍՈՎՈՐՈՂԻ

ԱՐԺԵՀԱՄԱԿԱՐԳԻ ՁԵՎԱՎՈՐՄԱՆ ԳՈՐԾՈՒՄ

ՀԱՅ ՄԱՐԴՈՒ ԱՐԺԵՔԱՅԻՆ ՀԱՄԱԿԱՐԳԻ

ԱՌԱՆՁՆԱՀԱՏԿՈՒԹՅՈՒՆՆԵՐԻ ՈՒՍՈՒՑՈՒՄԸ ՀԻՄՆԱԿԱՆ ԴՊՐՈՑՈՒՄ

ԴԱՍԻ ՆՍՈՒՇ_ՕՐԻՆԱԿ

ԵԶՐԱԿԱՑՈՒԹՅՈՒՆ

ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

ՆԵՐԱԾՈՒԹՅՈՒՆ

Հոգևոր և աշխարհիկ արժեքները անընդհատ և արագ փոխվում են՝ մեր հարափոփոխ կյանքին ու կենսակերպին զուգընթաց: Երբեմն երեկվա աներկբա արժեքը այսօր անարժեք և սովորական է դառնում:

Արժեքը մեզ համար թանկ և կարևոր կողմնորոշումն է, առանց որի չենք էլ պատկերացնում մեր կյանքը: Արժեհամակարգը մարդու բարոյական, գեղագիտական, հոգևոր, իմացական, մշակութային և էթնիկական արժեքների համախումբն է, որն անհրաժեշտ է անձի ներդաշնակ, բազմակողմանի ձևավորման և զարգացման համար: Մատաղ սերնդի առողջ արժեհամակարգի ձևավորումը եղել և մնում է կրթության պատասխանատուների ուշադրության կենտրոնում՝ կազմելով ուսումնական բոլոր ծրագրերի հիմքը:

21-րդ դարում հանրակրթությունը նպատակ ունի «ձևավորելու որոշակի կարողություններով զինված հայ քաղաքացի, որը պատրաստ է քննական վերլուծության ենթարկելու իրադրությունը, գործելու հանուն իր երկրի բարօրության, բարգավաճման»:¹ Արժեհամակարգի ձևավորման և նրա հարաբերական կայունության ապահովման համար հանրակրթության բնագավառում կարևոր և անփոխարինելի նշանակություն ունեն բոլոր ուսումնական առարկաները, որոնց թվում, այնուամենայնիվ, արժեքների ձևավորման առումով չափազանց մեծ է հումանիտար ոլորտի ուսումնական առարկաների, մասնավորապես՝ լեզվի և գրականության անգնահատելի դերը: Հայոց (մայրենի) լեզվի և գրականության (հայ գրականության) դասավանդումը բացառիկ դեր ունի անհատի, պետականամետ հայ քաղաքացու արժեքային համակարգի, նրա բարոյական նկարագրի ձևավորման գործում: Առարկաների դասավանդման նպատակները հստակ ձևակերպված են հանրակրթության հիմնական ծրագրերի յուրաքանչյուր դասարանի համար նախատեսված վերջնարդյունքների մեջ: Հայոց(մայրենի) լեզվի և գրականության (հայ գրականության) ուսումնառության ընթացքում «ձևավորվում, զարգանում և կատարելագործվում են սովորողի անձնային

նկարագիրը, վերաբերմունքը կամ դիրքորոշումը իր երկրի, պետության, ազգային արժեհամակարգի, սեփական անձի և կյանքի հանդեպ»:²

Ուսումնական գործընթացի ընթացքում արժեքների դաստիարակչական ներգործության բարձրացման կարևոր պայմաններից են նաև ուսուցչի քաղաքացիական դիրքորոշումը, ձգտումը՝ դաստիարակել բարձր արժեքներ կրող քաղաքացիներ, նրա մտահորիզոնը, հասարակական լայնախոհությունը, սերը երեխաների նկատմամբ:

Ավելորդ չենք համարում նշել նաև, որ ուսուցիչներին համար սովորողի արժեհամակարգի ձևավորման պատասխանատվությունն ու աշխատանքը չի սահմանափակվում միայն դպրոցական պատերի ներսում, զուտ դասաժամի ընթացքում:

Ըստ այդմ՝ հետազոտական աշխատանքի ընտրված թեման համարում ենք արդիական, և կփորձենք ներկայացնել մեր մոտեցումները՝ Հայոց(մայրենի) լեզվի և գրականության (հայ գրականության) ուսումնառության ընթացքում դասարանային և արտադասարանային միջոցառումների շնորհիվ սովորողի արժեհամակարգի ձևավորման խնդրի շուրջ:

¹- ՀՊԶ, հաստատված Հավելված 2, ՀՀ կառավարության 2021թ.փետրվարի 4-ի N 136_Ն , 2010թ ապրիլի 8-ի N439_Ն

²- ՀՊԶ,ավելված 2, ՀՀ կառավարության 2021թ.փետրվարի 4-ի N 136_Ն , 2010թ ապրիլի 8-ի N439_Ն

ՀՊԶ ՊԱՀԱՆՋՆԵՐԸ ԵՎ ՀԱՅՈՑ ԼԵԶՈՒ, ԳՐԱԿԱՆՈՒԹՅՈՒՆ

**ՈՒՍՈՒՄՆԱԿԱՆ ԲՆԱԳԱՎԱՌՆԵՐԻ ՆՊԱՏԱԿՆԵՐԸ՝ ՍՈՎՈՐՈՂԻ
ԱՐԺԵՀԱՄԱԿԱՐԳԻ ՁԵՎԱՎՈՐՄԱՆ ԳՈՐԾՈՒՄ**

Ժամանակակից մանկավարժության համար գերխնդիր է սովորողների ազգային գիտակցության ձևավորումը սեփական ժողովրդի պատմության ու մշակույթի հենքի վրա՝ չանտեսելով համամարդկային արժեքները, որովհետև այսօր աճող սերնդի դաստիարակության գործն ընթանում է տարբեր հանգամանքների ազդեցության ներքո՝ ժողովրդագրական, ազգային, մշակութային, ընտանեկան, կրթական, հասարակական, սոցիալական և այլն: Կրելով վերոնշյալ և այլ հանգամանքների ներգործությունը, ընտրությամբ յուրացնելով դրանց ազդեցությունը՝ աշակերտը հաղորդակցվում է հասարակական մշակույթին և ձևավորվում իբրև ստեղծագործական անհատականություն:

Հայոց(մայրենի) լեզվի և գրականության (հայ գրականության) ուսումնական բնագավառը բովանդակում է դաստիարակչական վիթխարի ներուժ, հայրենասիրություն և ազգային արժանապատիվ գոյություն: Գրականության իմացությունը հնարավորություն է տալիս Հայաստանի Հանրապետության ապագա քաղաքացուն գնահատել և ըստ անհրաժեշտության կիրառել ուսումնառության ընթացքում ձեռք բերած գիտելիքներն ու ճանաչողական հմտությունները, հայոց քաղաքակրթության դարավոր մշակույթը, ավանդույթները, փորձը: Հանրակրթական դպրոցն ավարտող յուրաքանչյուր աշակերտ պետք է լինի հայրենասեր և պատրաստ՝ ծառայելու հայրենիքի պաշտպանության գործին, կարևորի ազգային-պետական մտածողության և գործելակերպ ունենալը և դրսևորի դրան հասնելու ձգտում ու կամք, ունենա ազգային ինքնագիտակցություն, կարևորի ազգային հիմնախնդիրների լուծման գործում իր մասնակցության անհրաժեշտությունը, ունենա արդարության, լավատեսության և պատասխանատվության զգացում, գիտակցի ներկան և ապագան կերտելու խնդրում ազգայինի դերը, գիտակցի իր ժողովրդի նյութական և հոգևոր արժեքները պահպանելու անհրաժեշտությունը, գիտակցի, որ կյանքում իր համար կարևորագույն արժեքներից են լինելու գիտելիքները, աշխատանքային հմտությունները, մասնագիտական

վարպետությունը և այլն. . .

Ուսուցման գործընթացում լուծվում են սովորողների կրթական, դաստիարակչական կամ արժեքային և ընդհանուր զարգացման խնդիրներ: Հաշվի առնելով տվյալ առարկայի և թեմայի ուսումնասիրման հիմնական խնդիրները, որոնք ներկայացված են առարկայական ծրագրերում՝ ուսուցիչն առանձնացնում է ընդհանուր դաստիարակչական խնդիրները, որոնք առանձին աշակերտների մոտ հաճախակի են դրսևորվում: Դրա համար յուրաքանչյուր դասի դաստիարակչական խնդիրների լուծումը նախատեսում է ոչ թե մեկուսացված կամ առանձին մոտեցում, այլ գիտելիքների ու կարողությունների, արժեքային որակների, կամքի, բնավորության, զգացմունքների, հոգեբանական, տարբեր դրսևորումների միաժամանակյա և փոխկապակցված մոտեցում: Ուսուցման կազմակերպման տարբեր ձևերի (դաս-դասարանային, անհատական, խմբային, էքսկուրսիա, դասդեկական ժամ, արտադասարանական միջոցառումներ և այլն) ընտրության միջոցով ուսուցիչն առավել արդյունավետ է դարձնում աշակերտների արժեհամակարգային դաստիարակչական խնդիրների լուծումը՝ հաշվի առնելով ստորև նշված գործոնները

- 1) սոցիալական պատվերով պայմանավորված՝ դասերին ներկայացվող պահանջների գիտակցում և կատարում,
- 2) նպատակները, ինչպես նաև ուսումնադաստիարակչական և զարգացնող խնդիրները,
- 3) ուսումնական գործընթացի օրինաչափությունները և սկզբունքները,
- 4) դեպի ազգային արժեքներ ուսուցման կողմնորոշումը,
- 5) սովորողներին ազգային և համաշխարհային մշակույթի, մարդկության հոգևոր փորձին ծանոթացնելու՝ գրականության դասերի ուղղվածությունը,
- 6) դասերի ժամանակ համաշխարհային և ազգային գրականության համամասնության պահպանումը,
- 7) սովորողների մոտ տեղեկատվություն աղբյուրների նկատմամբ քննադատական վերաբերմունքի ձևավորումը, դրանց հետ ինքնուրույն աշխատելու և հետևություններ

անելու կարողությունների մշակումը,

8) ստեղծագործական, զգացմունքային մթնոլորտի ձևավորումը, որը հենված է դասի բովանդակության և ուսումնական աշխատանքի նկատմամբ սովորողների հետաքրքրությունների վրա:

Հայոց(մայրենի) լեզվի և գրականության (հայ գրականության) ` Հանրակրթության պետական չափորոշչի դրույթների, պահանջների, դպրոցի յուրաքանչյուր աստիճանի կամ ծրագրի համար մշակված վերջնարդյունքների հիման վրա ձևավորված հիմնական հասկացություններից այս թեմային կառանձնացնենք մեր թեմային առնչակից **Ինքնություն** հիմնական հասկացությանը և **Վերաբերմունք ու Արժևորում** ենթահասկացությունները:

Հանրակրթության հիմնական ծրագրի 5-6-րդ դասարանների վերջնարդյունքներից առանձնացրել ենք, որ սովորողը պետք է`

- հարգալից վերաբերմունք դրսևորի մայրենի լեզվի հանդեպ, չաղավաղի, չաղճատի լեզուն օտար բառերով և արտահայտություններով, արժևորի մայրենիի դերը իր կյանքում, գիտակցի նրա ազգապահպան դերը
- լինի հանդուրժող, այդ թվում նաև ընկերների այլակարծության դեպքում
- հաղորդակցվելիս հարգալից խոսքով իր վերաբերմունքը դրսևորի հասակակիցների և մեծահասակների նկատմամբ,
- լինի հոգատար, շրջահայաց, համագործակցող, կիրառի բարեկիրթ, քաղաքավարի բառեր, արտահայտություններ....

7-9-րդ դասարաններում զարգացվում և հավելվում են ներքոնշյալ վերջնարդյունքները`

- արժևորի ազգայինը, սեփական ազգի հերոսական անցյալը, հայ գրականության դերը հայ ժողովրդի ինքնության պահպանության գործում
- վստահորեն համագործակցի համայնքի այլ անդամների հետ` ձևավորելով

թիմային մտածողություն

- լսի դիմացինին առանց ընդհատելու և դրսևորի հարգալից վերաբերմունք
- հայ գրողների կենսագրական փաստերի, նրանց հայրենանվեր գործունեության օրինակով զբաղվի ինքնադաստիարակությամբ, զարգացնի արդարամտություն, լայնախոհություն, համարձակություն, տոկունություն, հավասարակշռվածություն

□ զարգացնի հետաքրքրություն գրքի և ընթերցանության հանդեպ՝ որպես ներդաշնակ անձնավորություն, որը պատրաստ է սովորելու ողջ կյանքի ընթացքում: Ավագ դպրոցի հայոց լեզվի և հայ գրականության առարկայական չափորոշչում ևս մեծապես կարևորվում է դասավանդման ընթացքում «անհատի և քաղաքացու բարոյական կերպարի և արժեքային համակարգի» ձևավորման խնդիրը: «Ավագ դպրոցում հայոց լեզվի և հայ գրականության դասընթացը, բուն լեզվական և գրականագիտական գիտելիքներ տալուց բացի, պետք է համոզմունք մշակի ժողովրդի կյանքում և նրա ազգային նկարագրի վերջնական ձևավորման վերաբերյալ»³: Այնուհետև ընդգծվում է, որ հայ գրականության դասընթացի հիմնական նպատակներից մեկը «անհատի հոգևոր ու մտավոր զարգացմանը, անձի արժեքային համակարգի ձևավորմանը նպաստելն է, որի իրականացման համար անհրաժեշտ է սովորողներին հաղորդակից դարձնել հայ ժողովրդի հոգևոր ժառանգությանը, ազգային ու համամարդկային իդեալներին ու ձգտումներին, գրական հերոսների օրինակով և գրական երկերի գաղափարագեղարվեստական հարստության օգտագործմամբ նրանց մեջ սերմանել բարոյական արժեքներ՝ մարդասիրություն, բարություն, ընկերասիրություն, ազնվություն, պատվախնդրություն, պատասխանատվություն, հաստատականություն, բարեխղճություն և լիարժեք ու ներդաշնակ մարդու բարոյականային այլ հատկանիշներ»⁴:

Ապագան կերտողը, հայ հոգևոր արժեքները պահպանողն ու շարունակողը հենց

այդ սերունդն է լինելու, և նրա վաղվա գործելակերպն ու ազգապահպան դերը պայմանավորված է այսօր ձեռք բերած գիտելիքներով և դաստիարակությամբ, այլ կերպ՝ նրա ազգային հոգեկերտվածքի ձևավորմամբ:

Այս ամենի պատասխանատվությունն ընկնում է դպրոցի, հատկապես՝ հայոց լեզվի և գրականության ուսուցչի ուսերին:

³- ՀՊԶ, հաստատված Հավելված 2, ՀՀ կառավարության 2021թ.փետրվարի 4-ի N 136_Ն, 2010թ ապրիլի 8-ի N439_Ն

⁴- ՀՊԶ, հաստատված Հավելված 2, ՀՀ կառավարության 2021թ.փետրվարի 4-ի N 136_Ն, 2010թ ապրիլի 8-ի N439_Ն

ՀԱՅ ՄԱՐԴՈՒ ԱՐԺԵՔԱՅԻՆ ՀԱՄԱԿԱՐԳԻ ՈՒՍՈՒՑՄԱՆ

ԱՌԱՆՁՆԱՀԱՏԿՈՒԹՅՈՒՆՆԵՐԻ ՀԻՄՆԱԿԱՆ ԴՊՐՈՑՈՒՄ

Նոր սերնդի արժեհամակարգի ձևավորման, կրթության և դաստիարակության գործում լուրջ անելիքներ ունի բնավ հայ դպրոցը, որի գերնպատակն է կերտել բարոյական, ազգային արժեքներով օժտված, ազգային նկարագիր ունեցող սերունդ: Այս նպատակն իրագործելու համար անհրաժեշտ է ուսումնասիրել ու կատարելագործել ոչ միայն հայրենի և համաշխարհային գիտությունների ճյուղերը, այլև մանկավարժության անցյալի ժառանգությունն ու նրա ժամանակակից փորձն ու մեթոդաբանությունը: Ուստի 21-րդ դարի դպրոցում դաստիարակության և կրթական գործընթացի ճիշտ կազմակերպման համար շատ կարևոր են ոչ միայն համամարդկային, այլև հայրենի մշակույթի բարձրարժեք ստեղծագործությունների ուսումնասիրումն ու ուսուցումը: Այդ ստեղծագործություններում արտահայտված են մեր ժողովրդի հոգեկերտվածքը, աշխարհընկալումը, մարդասիրական գաղափարներն ու գալիքի երազանքները: Հայ ժողովրդի ավանդույթներում է, որ վառ կերպով արտացոլված են մեր ազգի ազգային հավաքական բնույթը, անդրդվելի կամքը, ներքին գորությունն ու հնարավորությունները, ապրելու, վերածնվելու և հարասուելու ունակությունը, ազգերի պատմության մեջ իր արժանի տեղն ունենալու ձգտումը: Այս ամենն է, որ անհրաժեշտ է ավանդել ժամանակակից էթնոկրին: Այդպես նա պիտի հասնի այն գիտակցության, որ հասարակական կյանքի առաջընթացը պայմանավորված է համախմբվածությամբ, գիտելիքների բարձր մակարդակով ու մշակութային արժեքների ոչ միայն ստեղծմամբ, այլև պահպանմամբ: Կլինի սերունդ, որը կկարողանա շարունակել ազգային լավագույն ավանդույթները, աշխարհին ու մարդկությանը ցույց տալ իր մշակութային հարստությունն ու բարոյահոգեբանական արժանիքները: Ժամանակակից դպրոցի կարևորագույն առաքելություններից մեկն էլ երեխայի մեջ իր ազգին բնորոշ բարոյական և հոգևոր արժեքների ձևավորումն ու զարգացումն է: Նրա խնդիրն է պահպանել և փոխանցել այն արժեքները, որոնք ժառանգել ենք մեր նախնիներից, և որը մեր անխառն ինքնատիպությունն է համաշխարհային մշակույթի բազմերանգության ու

բազմազանության մեջ:

Յուրաքանչյուր աշակերտ պետք է իմանա, որ որպես հայ՝ ո՞րն է իր անելիքն այստեղ՝ հայրենիքում: Ազգային գաղափարախոսությունն պետք է հուշի սեփական պատմական առաքելությունը, որտեղ ամենակարևորը հայրենիքը սիրելն է իրական սիրով: Հենց այս պատճառով է, որ կրթության հենքը և գլխավոր իմաստը պետք է դառնա արժեհամակարգի ձևավորումը, իսկ երբ վերանում են արժեքների ձևավորման ազգային և համամարդկային ընդհանրական չափանիշները, և վարքի կարգավորիչ են դառնում իրավիճակն ու պահի նպատակահարմարություն, արժեհամակարգի գոյությունը կամ բացակայությունը դառնում է ազգային-հասարակական կարևորության խնդիր, որովհետև արժեհամակարգը պետք է ձևավորվի ազգային հոգևոր-բարոյական ընդհանրականության հիմքի վրա:

Ազգային արժեքները համամարդկայինից չառանձնացնելով անգամ՝ ուսուցիչը, այնուամենայնիվ, ուսուցման ընթացքում չի կարող չընդգծել միայն հայ մարդուն և հայ հողին բնորոշ շատ արժեքներ, որոնց շնորհիվ պահպանվում են հայ մարդու դիմագիծն ու ազգային պատկանելիությունը: Կան միայն հայկական խորհրդանիշներ, որոնց կրողն ու շարունակողը հայ երեխան պիտի լինի: Դրանք պետք է որոնել հայոց լեռների ու ջրերի, ավանդույթների ու ծեսերի, քարի ու քարեղեն մարմնացումների, հողի ու ծառի, մարդկային այն որակների մեջ, ովքեր իրենց անուն-ազգանունով ազգային երևույթ են՝ Մաշտոց ու Մամիկոնյան, Համբարձումյան ու Թամանյան, Նարեկացի ու Չարենց. . . :

Այստեղ տեղին է ընդգծել ազգային մշակույթն ու պատմությունն ուսումնասիրող բնագավառների հետ միջառարկայական կապը:

Հայրենասիրությունն այն մեծագույն արժեքն է, որ հարզանք ու պատկառանք է հարուցում, նույնիսկ երբ դրսևորվում է հակառակորդի կամ թշնամու մոտ: Ի դեպ, յուրաքանչյուր ուսուցիչ ունի որոշակի հեղինակ կամ ստեղծագործություն, որը նրան ամենադյուրին կերպով է օգնում իր մանկավարժական խնդիրները լուծելու, տվյալ դեպքում՝ հայրենասիրության բարձրագույն արժեքը սաների հոգիներում սերմանելու համար: Նա առանձնացնում է ընդհանուր դաստիարակչական խնդիրները, որոնք

առանձին աշակերտների մոտ հաճախակի են դրսևորվում:

Լեզու և հավատ «Հայ գրերի գյուտը: Մ. Մաշտոց: Կենսագրական տեղեկություններ:
Կորյուն. «Վարք Մաշտոցի» երկը» թեմաների և զանազան մեթոդական հանարների
միջոցով ամենից առաջ հետաքրքրություն պիտի առաջացնենք սովորողների մեջ՝ և
Մաշտոցին, և նրա մեծ սխրանքը դիտարկելով որպես հայոց սրբությունների սրբոցը:
Լրացուցիչ նյութ ենք ընտրում Արա Աբգարյանի «Անդորրության արարիծը»
աշխատությունից. «Սուրբ Մեսրոպի տեսիլքը և հայոց գրերի գյուտը տեղի է ունեցել
Բալու կոչվող բերդի մոտ գտնվող նեղ քարայրում, և այս բառի տառերի բառային
իմաստները բնութագրում են բառն այսպես՝ Բ-Բանն, Ա-Աստծու, Լ-Լուստ, ՈՒ-ՈՒղերձ:

...Հայոց այբուբենն Ադոթք է. . . Սուրբ Մեսրոպը ճգնակեցական տքնությամբ,
քառասնօրյա պատվ և անդադար ադոթքներով էր Աստծուց ակնկալում ազգային
ինքնության, ազգային Ոգու, Հոգու և Մարմնի արտահայտությունը. . . տառերի
տեսքով, որը և նրան տվեց Տիրոջ լուսավոր Հրեշտակի և հրեշտակների Տիրոջ
հայտնությամբ. . . »:⁷

Ըստ դասարանների կամ ուսումնական տարիների հաջորդականության, կապված
դովորողների տարիքային աճի և հոգեբանական ու գիտակցական փոփոխությունների
հետ, խորացվում են մայրենի լեզվի ու սուրբ հավատի ոգեղեն արժեքների մասին
հաղորդումները՝ նորանոր գուգորդումների, լեզվական և խոսքային պատկերավորման
միջոցների դրսևորմամբ:

Լույս և հայ: Լույս և զինվոր: Լույս և հավատ: Այս համադրություններն են
ներկայացնում հայոց գրերը Մ. Գալշոյանի «Մամփրե արքան» պատմվածքի՝ հայոց
դիցաբանության հերոսների հիշեցնող գրական կերպարին՝ ծերունի Մամփրեին:
«Մաշտոցի գիրը նրա համար եփած հաց է, թնի տակ դրած հաց. . . », - խորհում է
Մամփրեն համազյուղացու՝ Ավեի մասին: Իսկ նրա կարծիքով՝ Մաշտոցի տառերը
«Տառերը զինվորներ են: Գեղեցկադեմ, մաքուր և զուլալ և արի զինվորներ: Զինվորներ: Ոչ
թե ասկյարներ, այլ զինվորներ»:⁸

Արժեքային այս հստակ հոգեկերտվածքով սնված հայ պարմանիներն ու

պարմանուհիներն այսուհետ իրենց համար որպես հոգևոր հաց պիտի ունենան մայրենի լեզուն և նրա նկատմամբ պաշտամունքը: Ու նաև հպարտությունն այն քանի հանդեպ, թե «համայն աշխարհում այդ քանի երկիր. . . » սեփական հազարամյակներից եկած Այբուբեն ունի: Այդ հպարտությունն է քաջալերում Մամփրե արքային՝ մտովի դիմելու արյունարբու սուլթանին. «Դու սուլթան ես, բայց քո սեփական տառերը չունես և քո արյունոտ հրամանները գրում ես այլոց տառերով: Իսկ մենք թագավոր չունենք, բայց ունենք սեփական գիր: Եվ իմացած եղիր, որ Սուրբ Մաշտոցի գիրն էլ մեր թագավորն է. . . »:⁶

Մեր գիրը մեր թագավորն է: Այս միտքն էլ, որպես թևավոր դարձվածք, տեղ պիտի գտնի հայ դպրոցականի մտքում և հոգում:

Հայ երեխայի արժեքային համակարգի ձևավորման գործում կարևոր է նաև քարի, հողի, ջրի, Արարատ լեռան, մայր Արաքսի, սրբազան Արածանիի, հայոց խաչքարերի, մամռակալած վանքերի ու եկեղեցիների հանդեպ ակնածանքի, հիացումի, հպարտության զգացումների սերմանումը:

Հայ ժողովրդական առասպելաբանության, հատկապես՝ «Մասնա ծոեր» դրուցագներգության, Հ. Թումանյանի «Մասունցի Դավիթ», Ավ. Իսահակյանի «Մասնա Մհեր» պոեմների ուսուցումը (կամ ուսուցչի կողմից հատվածական, ընթերցումները, որպես նախազգային ածպատանքի հիմք՝ աշակերտներինուղղորդելը) դպրոցում պետք է ծառայեցնել հենց այս նպատակին: Արժեքային համակարգի սաղմերը «Մասնա ծոեր» դրուցագներգության հերոսների բարոյական նկարագրի մեջ են խտացված:

Ազատասիրությունն ու հայրենասիրությունը, որ մեր առասպելաբանության և «Մասնա ծոեր» դրուցագներգության գլխավոր գաղափարներն են, հայ դպրոցականը պիտի ընկալի այն տեսանկյունով, որ բարոյական այդ արժեքները դեպքից դեպք դրսևորվող երևույթներ չեն:

Ազնվություն, վեհանձնություն, ճշմարտություն, ազատասիրություն ու հայրենասիրություն. այն բարձր գաղափարներն են, որոնք հատուկ են հայ մարդուն, և

որոնցով նա հավասար իրավունքներով իր տեղն է զբաղեցնում համամարդկային արժեքներով հարուստ կլոր սեղանի շուրջ նստած աշխարհի մյուս ժողովուրդների կողքին:

Ազատասիրությունը, անկախության ձգտումը և արդար գոյամարտի գաղափարը Մասնա հերոսները, նրանց նախորդները և հետնորդները ժառանգել են Հայկ նահապետից: Այս բարոյական գծերը հայ ժողովրդի արյան մեջ են և հոսում են նրա երակներով: Մ. Խորենացու «Հայոց պատմության» մեջ տեղ գտած Հեթանոս դիցարանի աստվածների, կիսաստվածների առասպելական և պատմական հերոսների սխրալից արարքները պատկերող Գողթան երգերից, մեր հին վեպից մնացած պատառիկների մեջ գենետիկորեն անցնող բարոյական հատկանիշների շղթան վկայությունն է հայ տեսակի ազգային խառնվածքի ու դիմային ամբողջական բնութագրման՝ հյուրընկալություն, քաջություն, սխրագործություն՝ հանուն ազատության, արդարության, կառուցող ոգի, արժանապատվություն շիտակություն, իմաստնություն, հարգանք մեծերի հանդեպ, ծնողապաշտություն, սեր գրի և դպրության նկատմամբ և այլն, և այլն:

Ազնվությունն ու հպարտությունը հայոց տոհմիկ, արյան բաղադրամաս կազմող բարոյական արժեքներն են, և գրական երկում դրանք մարմնավորված են բառերի մեջ: Մարոյանի հերոսը՝ Արամը, ասում է. «Մենք աղքատ էինք: Մենք փող չունեինք: Մեր ամբողջ տոհմը ծայրահեղ աղքատ էր: Ամենակարևորը, սակայն, այն էր, որ մենք հոչակված էինք մեր ազնվությամբ»:⁷

Օտարն էլ էր այդպիսին ճանաչում հայ ընտանիքը. «Կերդվեի, որ իմ ձին է, եթե ձեր ծնողներին չճանաչեի: Ձեր ընտանիքի ազնվության համբավը լավ հայտնի է ինձ. . . .», - խոստովանում է ասորի ազարակատեր Ջորջ Բայրոն: («Գեղեցիկ սպիտակ ձիու ամառը»¹¹):

Վեհանձնության ու հպարտության ազնվական բարոյական արժեքները հայ թագավորներից և սպարապետներից փոխանցվել են սերնդեսերունդ: Սովորողը պիտի իմանա և գնահատի Մուշեղ Մամիկոնյանի վեհանձն արարքը. նա թշնամու գերի ընկած կանանցը մեծ արժանապատվությամբ ուղեկցում է Պարսկաստան:

Սասունցի Դավիթը Թշնամու մորն ու քրոջն է բաշխում առաջին զարկերը, իսկ կովից հետո, ականջալուր արաբ ծերունու իմաստնությանը, ազատ է արձակում Մսրա Մելիքի գորքին:

Հայոց պատմության մեջ հայ կնոջ և մոր կերպարը, ծնողապաշտությունը ևս մեծ արժեքներ են Տիգրանուհին («Տիգրան և Աժդահակ» առասպելից), Եղիծեի մատյանի «Տիկնայք փափկասուն հայոց աշխարհի», որոնց նոր շուք հաղորդեց Մամիկոնյան Մեծ տիկինը, Խանդութը, Աստղիկը, Անահիտը (Դ. Դեմիրճյանի «Վարդանանք»), Այծեմնիկը՝ Անիի պաշտպանության քաջարի հայուհին, Փառանձեմ թագուհին (Բուզանդ, Բաֆֆի), Մոսեն և այսօր արդեն նորօրյա հերոսուհիները:

Մարդասիրության ու բարության, կյանքում և արվեստում գեղեցիկն ու վեհը ընկալելու առումով սերունդներ են դաստիարակել Շիրվանզադեի Լևոնը («Արտիստը»), Նար-Դոսի Անտոնիոն («Ես և նա»), Թումանյանի, Զորյանի, Մահարու հերոսները:

Արժեքային համակարգ ձևավորում են նաև մեր պատմական հուշակոթողները: Գառնին ու Գեղարդը (հատվածներ ենք կարդում Կիմ Բակշիի, Վ. Բիտովի հոդվածներից (5-րդ դասարան)):

Հայոց խորհրդանիշներ են նաև նուռը, ծիրանը, սուսին, հայրենի հողը:

Վերոնշյալ արժեքները դասարանային մակարդակից արտադասարանայինի անցկացնելու համար կարող ենք կիրառել դասավանդման այսպիսի մեթոդներ, որոնք գործնականում հետաքրքրում են սովորողներին («Մեթոդ» բառը ծագում է հունարեն «մեթոդոսից», որը 2010թ բառացի թարգմանությամբ ոուսերեն նշանակում է «հետազոտության, տեսության ճանապարհ» և որևէ նպատակի կամ կոնկրետ խնդրի լուծման ճանապարհ:)

Մեր նպատակադրմանը աջակցում է, օրինակ, երբ հանձնարարում ենք բեմադրել հեքիաթը՝ հարստացնելով երկխոսությունները (5-րդ դասարան): Սովորողների ավելացրած երկխոսություններն արտացոլում են թեմայի հանդեպ նրանց դիրքորոշումն

ու վերաբերմունքը: Այդպիսով հնարավոր է դառնում ուղղորդել սովորողին դեպի ճիշտ արժեհամակարգ, ուղեկցել դեպի մնայուն արժեքների դաշտ:

Էքսկուրսիաներ - ուսուցման կազմակերպման այս ձևը,ևս, որում ուսումնական աշխատանքն իրականացվում է ուսումնառության օբյեկտների հետ անմիջական ծանոթության շրջանակներում, չափազանց տպավորիչ և ազդեցիկ է լինում: Դեպի Խ. Աբովյանի տուն-թանգարան այց-էքսկուրսիան բացում է սովորողների առջև հայրենի տունն ու հայրենիքը սիրելու և արժևորելու, ստեղծագործության արժեքները կյանքի առօրյային կապելու այնպիսի հորիզոններ, որոնք ազդում են այցելուի գիտակցական, դատողական ու ճանաչողական մտածողության վրա՝ խորացնելով հայրենասիրության գուցե չգիտակցված ազդակները:

Տնային աշխատանք կազմակերպման ձև է, որի դեպքում կրթական աշխատանքը բնութագրվում է ուսուցչի անմիջական ղեկավարության բացակայությամբ

Արտադասարանական աշխատանք. Գրական որևէ հերոսի մասին զարգաթերթիկ, խաչքառ, նկարելուկ-ռեբուս, հանելուկ հորինելը, վիկտորինաներն ու օլիմպիադաները ևս նպաստում և լավագույնս զարգացնում են սովորողների անհատական ունակությունները

ԿԱՊԿ ունեցող սովորողներն այս ամենի շուրջ կարող են կատարել քարտային աշխատանքներ՝ ըստ կարիքի: Կարող են կտրտած տառերով անուններ կազմել, նկարները համապատասխանեցնել անուններին , ներկել կամ նկարել ընկալաձր:

5- Դ. Գասպարյան, Գրականություն, դասագիրք հանրակրթական դպրոցի 7-րդ դասարանի համար, Երևան, Տիգրան Մեծ, 2016, էջ 191

6-Դ. Գասպարյան, Գրականություն, դասագիրք հանրակրթական դպրոցի 7-րդ դասարանի համար, Երևան, Տիգրան Մեծ, 2016, էջ 192

7- Վ. Սարոյան, Գեղեցիկ, սպիտակ ձիու ամառը(արտադասարանային ընթերցանության ցանկից)

ՍՈՎՈՐՈՂԻ ԱՐԺԵՔԱՅԻՆ ՀԱՄԱԿԱՐԳԻ ՁԵՎԱՎՈՐՄԱՆՆ ՈՒՂՂՎԱԾ ԴԱՄԻ
ՆՄՈՒՇ_ՕՐԻՆԱԿ

ԴԱՄԱՐԱՆ՝ 6-րդ

ԱՌԱՐԿՄ՝ գրականություն

ԹԵՄԱ՝ Գ. Էմին «Պատգամ»(2 ժամ)// Բառի բաղադրիչներ

ՆՊԱՏԱԿՆԵՐ(1-ին դաս)

- ձևավորել դպրոցական հանրագիտարանից կամ կայքէջից (տարիքին համապատասխան) բանաստեղծության հեղինակի մասին տեղեկություններ հավաքելու, հետազոտելու հմտությունները
- զարգացնել չափածո տեքստը արտահայտիչ, վարժ ընթերցելու հմտությունը
- նպաստել տեքստի հնչյունական արտահայտչամիջոցները, անձանոթ բառերը ճանաչելուն
- զարգացնել բառարանների (տպագիր, էլեկտրոնային) օգնությամբ դրանց բացատրությունն ու հոմանիշները գտնելու կարողությունը
(2-րդ դաս)
- խթանել հայերեն գրագետ,բանավոր խոսքով բանաստեղծության բովանդակությունը վերաշարադրելու, սեփական կարծիքն արտահայտելու հմտությունը
- ըմբռնել տեքստում գրական կերպարի ճանաչման, բնագրի միջոցով բնավորությունը բնութագրելու, դեպքերի զարգացման ընթացքը տեքստից դուրս գրած փաստերով հիմնավորելու նրբությունները
- զարգացնել բանաստեղծությունը բեմադրելու և երկխոսություններով հարստացնելու կարողությունը
- ուսումնասիրել հայ մարդու(լեռնական հայի) բնավորությունն ու արժանիքները,
- արժևորել վեհությունն ու հզորությունն ընդգծելու , միասնականությունն ու

կամքը, բարեկամին հարգելու և դավադիրին զանազանելու կարողության ներկայացումը չափածո խոսքի միջոցով

ՎԵՐՋՆԱՐԴՅՈՒՆՔՆԵՐ՝

սովորողը

- գրականության տեսրում ունենա էջ՝ նվիրված Գ. Էմինին՝ նրա մասին համառոտ տեղեկություններով
- արտահայտիչ և վարժ կարդա բանաստեղծությունը, բացատրի անծանոթ բառերը, ներկայացնի հոմանշային, հականշային գույգերը, բացատրի բառի կազմությունը
- հայերեն գրագետ, բանավոր խոսքով վերաշարադրի բանաստեղծության բովանդակությունը, ուրվագծերով ներկայացնի բանաստեղծության քնարական հերոսին՝ հայությանը կերպավորող հայ մարդուն, բնութագրի նրան, բնագրից բերված բառապաշարով հիմնավորի իր կարծիքը
- լեռնային նեղ ճամփեքին հանդիպող բարեկամ և դավադիր մարդկանց երկխոսության բեմադրությամբ արտահայտի սեփական վերաբերմունքը Հայկական լեռնաշխարհի, հայ մարդու բնավորության շուրջ

ՈՒՍՈՒՑՄԱՆ ՄԵԹՈԴՆԵՐ՝ «Ներածական զրույց», «Հնգյակ», «հարցուպատասխան», «Կրկնակի գրառումների օրագիր», «Քարտերով աշխատանք»

ՈՒՍՈՒՄՆԱԿԱՆ ՆՅՈՒԹԵՐ՝ գրականության դասագիրք, էջ 90-92, տետր, նշագրիչներ

ԴԱՍԻ ՏԵՎՈՂՈՒԹՅՈՒՆԸ՝ 45+45

ԸՆԹԱՑՔԸ՝

(1-ին դաս)

Կարճ հարցման միջոցով ստուգում ենք հին դասի յուրացումը և տնային աշխատանքը, կատարում շտկումներ(եթե անհրաժեշտություն կա), ամփոփում թեման, կատարում միավորային գնահատում, անցնում նոր թեմային:

Ներածական գրույց՝ նյութի ուսումնասիրությունից առաջ՝ աշակերտներին առաջիկա աշխատանքի մասին պատկերացում տալու նպատակով՝

- ինչպես ենք խոսում առօրյայում, ինչ հնչերանգով, ձայնի ինչ բարձրությամբ,
- երբ և ինչու է պետք զգույշ խոսել,
- արդյոք խոսելու հնչերանգով կարող էք բնութագրել մարդուն, ինչու էք այդպես կարծում:

(Ուսուցիչը հնարավորություն է ստեղծում, որ սովորողներն ազատ արտահայտեն իրենց կարծիքը, մտքեր փոխանակեն, շտկեն իրենց պատասխանը, դիմեն ընկերներին, քննարկեն ասելիքը և այլն):

Ունկնդրում ենք բանաստեղծությունը (օր.՝ Ն. Ավետիսյանի կատարմամբ) // երգը (Ս. Ամրոյանի կատարմամբ):

Կարծիքներ ենք փոխանակում տպավորությունների մասին:

Ընթերցում ենք բնագիրը:

(Ընթերցելու հմտության զարգացմանն ուղղված վարժություններին զուգահեռ ընդգծում ենք հայերենի հնչյունական և բառապաշարային հնավորություններով ասելիքն արտահայտելու, գրողի կողմից բանաստեղծության հետաքրքիր կառուցվածք ընտրելու այս բանաստեղծության առանձնահատկությունները:)

Ձևավորում ենք խմբեր, որոնց հստակ բացատրվում է՝ ինչ պիտի անեն՝

1. «Հնչյունաբաններ»- ուսումնասիրում են բանաստեղծության կառուցվածքը՝ տուն, հանգ, չափ,

2. «Իմաստագետներ» կատարում են դասագրքի էջ 92, վարժ. 1-3, պարզաբանում են «ճամփեք»-ի կիրառումը «ճանապարհների» փոխարեն,

3. «Բառագետներ»- բնագրում գտնում և դուրս են գրում կազմությամբ պարզ, ածանցավոր, բարդ բառերը, արմատներով կազմում նոր բառեր,

4. «Բեմադրիչներ» - երկխոսությամբ հազեցնում են բնագիրը, բեմադրում նեղ ճանապարհով անցնող երկու բարեկամ//չարական մարդկանց երկխոսությունը,

5.«Խորաթափանցներ»- բնագրից դուրս են գրում բառերի ուղիղ և փոխաբերական կիրառությունները, էջ 92, վարժ. 4-6 (դասագրքից),

6.«Նկարիչներ» -ըստ բանաստեղծության ներկայակի՝ նկարագրում,նկարում են մեր հայրենիքը, նրա բնակչին, ընդգծել բնաշխարհի և բնակչի միասնական, ընդհանրական գծերը

7.«Փիլիսոփաներ»- արժևորում են բանաստեղծությունը որպես պատկերավոր մտածողության և հային բնութագրելու, մեզ ճանաչելու, հոգևոր զարգացման միջոց:

ԿԱՊԿ ունեցող սովորողների համար նախապես պատրաստում ենք քարտարան՝ հայկական խորհրդանիշերով, որոնք աշակերտը դասավորում և փակցնում է տետրում(ինքնուրույն կամ օգնությամբ):

Տրվում է ժամանակ, աշակերտները լրացնում են «Կրկնակի գրառումների օրագիրը»

Գիտելի // Իմացա // Բնագրի համապատասխան տողերը, վերլուծություն (2-րդ դաս)

Սկսվում է աշխատանքների ներկայացմամբ: Ուսուցիչն ապահովում է բոլոր սովորողների մասնակցությունը, օգնում ճիշտ և գրագետ խոսքի կառուցմանը, հետևում սովորողների ներխմբային և միջխմբային համագործակցային և հանդուրժող վարքագծին: Յուրաքանչյուր խումբ իր հանձնարարության սահմաններում (և ոչ միայն) հայերեն գրագետ խոսքով արձակ կշարադրի բանաստեղծությունը, կհասկանա հերոսի սպրումներն ու հույզերը, կբացատրի բանաստեղծության խորհրդանիշերը, կարժևորի բանաստեղծությունը՝ որպես պատկերավոր մտածողության և հոգևոր զարգացման միջոց:

Ուսուցման գործընթացի մասնակիցները շեշտում են միջառարկայական կապերը հայոց պատմության, աշխարհագրության, արվեստ (ազգային երգ ու պարի, նկարչության հետ): (Խրախուսելի է, եթե սովորողները պարի(օրինակ՝ քոչարիի բեմադրությամբ) ցուցադրեն ուս ուսի պարող հայերի և հայկական լեռնապարի (լեռնաշխարհի) նմանությունը):

Դասի ամփոփման փուլում կատարում ենք «Հնգյակ» վարժությունը՝ «Հայ»

գլխաբառով:

Անդրադարձ՝ սովորողները վերլուծում և գնահատում են իրենց արած աշխատանքը (ինքնագնահատում), , նշում և կատած ձեռքբերումներն ու բացթողումները:

Ուսուցչի կողմից կատարվում է միավորային և խրախուսական գնահատում:

Տրվում է տնային աշխատանք՝ գրել փոքրիկ

շարադրություն//բանաստեղծություն՝ «Հայր և Հայաստանը» վերնագրով, նկարել կամ անգիր սովորել բանաստեղծությունը(ըստ ցանկության)

ԵԶՐԱԿԱՅՈՒԹՅՈՒՆ

Այսպիսով՝ մենք հաճախ օգտագործում ենք «արժեքներ» հասկացությունը: Բոլորս կարևորում ենք արժեքների ձևավորումը գալիք սերնդի մոտ և միգուցե այդ բառին ինչ-որ ենթազիտակցական իմաստ ենք հաղորդում: Փորձենք ձևակերպել, թե ինչ է ի վերջո «արժեք» ասածը: Մեզ համար շատ թանկ, կարևոր կողմնորոշումները, առանց որոնց չենք պատկերացնում մեր լիարժեք կյանքը, կոչվում են արժեքներ: Արժեքը հնարավոր չէ ստանալ հեշտությամբ, այն պետք է վերապրել, անցկացնել քո միջով, զգալ ու գիտակցել: Այդ ամենի դիմաց մենք ստանում ենք իմաստներ, քանի որ արժեքներն են իմաստավորում կյանքը: Առանց արժեքների կյանքը դատարկ է: Հեշտ, առանց կորուստների եւ հաղթահարումների ապրելն երբեք չի երջանկացնում հենց այն պատճառով, որ չի բերում արժեքների ձևավորման:

Արժեքների մեծ մասը սնվում է էթիկական նորմերից, ձևավորվում է դրանց շնորհիվ: Էթիկական նորմերը անհրաժեշտ են մարդկանց համակեցությունը ապահովելու համար՝ դրանք պարտադրում են հրաժարվել ցանկալիից հանուն ընդհանուր շահի: Դրանք տարբեր են ոչ միայն տարբեր հասարակություններում, այլև անգամ հասարակության տարբեր շրջանակներում, նույն երկրի տարբեր տարածքներում:

Զարգացած մշակույթները ունեն զարգացած էթիկական նորմեր: Երբ դրանք քայքայվում են, պահանջները նվազում են, առաջանում են արժեհամակարգային խնդիրներ: Ահա թե ինչու առաջին հայացքից անվտանգ թվացող տարատեսակ «ազատությունները» իրենց հետ մեծ վտանգներ են բերում: Արժեքային համակարգն ուղղակի կապվում է բարոյականության հետ:

Բարոյական է այն ամենը, ինչը նպաստում է արժեքների պահպանմանը և չի հակասում դրանց: Անբարոյական է ամենը, ինչը դեմ է արժեքներին եւ բերում է դրանց քայքայման: Օրինակ, ցանկացած հասարակության մեջ անբարոյական է դավաճանությունը միայն այն պատճառով, որ այն արժեզրկում է խոստումը: Եթե խոստումն արժեք չլինի, մարդկանց համակեցությունը կվերածվի մղձավանջի, քանի որ

կվերանա փոխադարձ վստահությունը: Հենց դրանով է վտանգավոր, օրինակ, կոռուպցիան, քանի որ այն դավաճանություն է հանրությանը տված խոստմանը:

Երբ փլուզվում են արժեքները, խախտվում է համակեցությունը և տարածվում անբարոյականությունը: Մարդիկ դժբախտանում են, տնտեսությունն անկում է ապրում, հանցագործությունները դառնում են համատարած, կյանքը կորցնում է իմաստի զգալի մասը, մարդիկ սկսում են հեշտությամբ իրար կոտորել:

Հենց այս պատճառով է, որ կրթության հենքը և գլխավոր իմաստը պետք է դառնա արժեհամակարգի ձևավորումը: Դպրոցը պետք է լինի օրինակելի տարածք, ուր հաստատուն են էթիկական նորմեր, ուր աշակերտները սովորում են դրանց համապատասխանել: Հաճախ դպրոցը ստիպված է պայքարել հանրության մեջ տարածված արատների դեմ և այդ պայքարում պարտավոր է հաղթել: Դպրոցում կյանքը չի կարող հեշտ լինել երեխայի համար՝ նա պետք է զգա և ցավ, և ուրախություն, ունենա թե դժվարություններ, թե հաղթանակներ: Դպրոցում աշակերտը պետք է ընկալի համակեցության նորմերի իմաստը և ընդունի դրանք: Այդ ամենի պտուղը կլինեն իրական արժեքները, այլ ոչ թե թելադրված, անգիր արած, բայց աշակերտի համար ոչինչ չնշանակող ճշմարտությունները: Եթե մենք՝ ուսուցիչներս, կարողանանք ունենալ այնպիսի դպրոցներ, որոնք կձևավորեն արժեքներ աճող սերնդի համար, կունենանք աշխարհի ամենալավ և ամենաիմաստալից կրթական համակարգը:

Գրականության դասի՝ մեր կողմից ներկայացված նմուշը սույն աշխատանքում տեղադրել ենք որպես առաջարկություն՝ տվյալ թեմայի շրջանակում սովորողի արժեքային համակարգում հայրենասիրություն, ինքնաճանաչման, ներհայեցողության հնարավորության, սեփական և ազգային արժեքները գնահատելու և դրանցով հպարտանալու վերջնարդյունքին հասնելու նպատակով:

Ամփոփելով՝ նշենք, որ սովորողների արժեքային համակարգը ձևավորվում է ոչ միայն դպրոցի շենքային պայմաններում, այլև արտադասարանային պայմաններում ևս՝ միջավայրում, հասարակության մեջ, ուստի յուրաքանչյուր մեծահասակ պարտավոր է իր օրինակով, իր բարոյական և արժեհամակարգային կերպարով ու նկարագրությամբ

օրինակ լինել երիտասարդ սերնդին:

ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

- 1) Ա. Գևորգյան, Ազգային կրթության դերն ու նշանակությունը սովորողների հայեցի դաստիարակության գործընթացում, Եր., 2002.:
- 2) Բաբանսկի Յու. Վ., Պոբեդանուցև Գ. Ա., Աշակերտների դաստիարակությանը կոմպլեքսային մոտեցում, Երևան, 1987թ., 112 էջ:
- 3) Դ. Գասպարյան, Գրականություն, դասագիրք հանրակրթական դպրոցի 7-9-րդ դասարանների համար, Երևան, Տիգրան Մեծ, 2016
- 4) Գրիգորյան Զ. , Հայ գրականություն, Ուսուցչի ձեռնարկ, Երևան, Մակմիլան Արմենիա, 2009
- 5) ՀՊԶ, հաստատված Հավելված 2, ՀՀ կառավարության 2021թ.փետրվարի 4-ի N 136_Ն , 2010թ ապրիլի 8-ի N439_Ն
- 6) Մուդրիկ Ա. Վ., Դպրոցականի անձը և նրա դաստիարակությունը կոլեկտիվում, Երևան, 1986թ., 86 էջ:
- 7) Վ. Սարոյան, Գեղեցիկ, սպիտակ ձիու ամառը(արտադասարանային ընթերցանության ցանկից)
- 8) Մուխոմլինսկի Վ. Ա., Միրոս նվիրում եմ երեխաներին, Երևան, 1977թ., 317 էջ: